

Pro Aritzo

S'eren torrados Randazzo chin Mura
T'eren tintu novellu unu retratu
Aritzo prus dechida t' eren fatu
Prus moderna it istada sa pintura

De Gennargentu bellesa e altura
Turisticu de monte ti ses fattu
Aghera bona b'as tue e recatu
E das reposu mudore e friscura

Carapignas niargios pius no as
Domos de nies as abandonadu
Como t'enit sa zente a bisitare

Finidu an fijos tuos cudd'annare.
De sa muntagna onzi innamoradu
Enit a a tie e alloggiu li das

Peppe Montesu
Nadale 2016

Pro Arzana

Miras dae Idolo ogni bellessa
Chi deus in sa zona bi at pintadu
De buscos e de umbras cucuzadu
Chi prenan de friscura e cuntentessa

Dae Ruinas bas a s'adde estesa
De Quirra e su sou marchesadu
Tue as sos Ilienses ospitadu
De Silise da sa peste ofesa

Reina ses de Monte e Pianura
De s'Ozashtra che ae dominante
De Gennargentu s'intrepida dama

In bonu e malu tue as tentu fama
Ca ses de coro e affettu bunnante
Dispensera de gajos e tristura

Peppe Montesu
Aprile 2017

Pro Atzara

Corriga e Tolu de bellos colores
T'an dadu insigna e in tela pintados
Predas chin muros e locos sacrados
Mustras ancora d'anticos lugores

De pinturas ses mama e de pintores
De alta iscola e numen famados
Sa tagiola e pannos ricamados
Ancor'ispantan mannos e minores

Da Bingia e Josso isparta ti ses
Fina Montica e Zuri e a Su Sussu
Cun Frusci, Corra Manna e cun Lodine

As zente meda e intellettu fine
Chì a tie dan lustru e de piussu
Ponennet' alas in palas e pees

Peppe Montesu
Nadale 2016

Pro Austis

Fis de cumannu, sede imperiale
De s'armada Romana ocupadora
Ma mai ses istada traitora
Semper de sardidade ses sinzale

Chin s'istranzu amica e coriale
De sas puntas reina abitadora
De su passadu ne mustras ancora
S'importu chi aias puntuale

Sa Conca , Crabarissa e su Cannizu
Naturales ti vestin de bellea
Daenne ispantu a s'uju in mirada

Nobile fis in s'era passada
De importu e de alta nobilesa
Chi galu oje a totu das abbizu

Peppe Montesu
Nadale 2016

Pro Bari Sardo

De Rubriensos fis logu e dimora
Canno Roma presidiu t'at fatu
De Bari fis sa villa in Giudicatu
Cann'in Gaddula non bi fis ancora

Poi est Pisa sa noa signora
Pustis su Regnu Sardu b'est infatu
Oje ti mantas amenu e adatu
D'essere Italiana servidora

In Puliga Niedda e Ibba Manna
Dae Mindeddu, Moru a ibbiscdda
Mustras antica sardas raichinas

De Mindeddu Sellersu sas ruinas
Contan predas de tempus innedda
Ca de ammentos sun ventana e janna

Peppe Montesu
Aprile 2017

Pro Baunei

Ses de calas bellissimas piena
Chi sun pinturas de mare a levante
Altare Gennargentu as a innante
Pares de sa Sardigna perla amena

Tue da Pedra longa che sirena
Ses de s'iscolliera dominante
Giradili de bellesa est abbagliante
Cun Ginnirco e Argenna achen cadena

Santu Predu in su Golgo est su padronu
In raccontos pienes de misteru
De s'isterru divinu sentinella

Tue d'Ozastrea naran ses sa Bella
E a su chi nos mustras paret beru
Ca totu Deus ti at dadu in donu

Peppe Montesu
Aprile 2017

Pro Belvì

Angius nariat chi fis che pintura
E d'arbures fozidos colorada
Dae altas muntagnas coronada
Donzi cosa t'at dadu sa natura

Cariasas castanz'aera pura
De nuciolas totue cropecada
Deliscia ses a s'anima afannada
E a corpus e mente das friscura

Su nomes tou sa Barbagia leat
Ne ses insigna e nobile pandera
De riguardu totue as nomea

Da Intra Montes a S'Isca ses che dea
Che perenne incantada primavera
Chi de ispantos s'anima recreat

Peppe Montesu
Jannarju 2017

Pro Birori

Devota a Sant'Antoni e Sant'Andria
De nuragicas predas ses piena
De Marghine ridente bidde amena
Birori ses tue una fotografia

De Torres fis una curatoria
poi de Arborea is a cadena
annos e tempos non t'an postu pena
ancora ses in caminu e in via

Funtana e Idda e Funtana Majore
Ti dan de virde festosu su mantu
E ti vestin de gala a die festa

De cuss'artu pianu ses sa testa
A sa piana li donas ispantu
Intro e coro a su visitadore

Peppe Montesu
Jannarju 2017

Pro Bitti

Ses dae Sant'Elia circundada
Dae Monte Bannitu a Cucureddu
Chin su Bonu Caminu aghes aneddu
Pares che dama in sa vadde corcada

Dae zente fiera populada
De simpatia e de bonu faeddu
In Romanzesu nuragich'isteddu
Mustras sa bell'istoria passada

In sa zona as mentou e ti dan vantu
Mantes'as in sos tempos su tratare
Chin sos modos distintos e faturas

De simpatia sos coros che furas
Ca connosches su bonu faeddare
Chi pones in totue denne ispantu

Peppe Montesu
Jannarju 2017

Pro Bolotana

Olothene is giamada in su passadu
Ca de sa vadde sos volos tenias
De Marghine sas jannas aperias
A sa Barbagia e su Barigadu

Palai est su puntu rinomadu
Da umbe nues de chelu ninnias
Terra d'anticas zentes e zenias
Chi dae josso su bolu an leadu

Baddes Salighes locu de incantu
Chin sa terras de Tirsu e de Bardosu
T'incastonan che prenda in su padente

Cussos pianos incantas ridente
Cun fainas e faghere operosu
Ch'a tie dan onore e ti dan vantù

Peppe Montesu
Jannarju 2017

Pro Borore

De funtana abbunanzia e richesa
Nan chi su numes tou at sinnificu
A pedes de su Marghine che mesa
Su campu tou in totue est riccu

A s'arte massajina das afficu
In Imbertighe mustras sa belleza
In sos duos Nuraghes torrat resa
Sa nadia e sa vide in custu bicu

Ses sa mama de nobiles nadias
E de turren nuragicas piena
Ch'ancora oe si mustran fieras

Terra d'ispigas lahores messeras
De tricos e d'incunzas fis sa bena
Chi galu mustras in campos e vias

Peppe Montesu
Jannarju 2017

Pro Bortigale

Tra Marghine Campeda e Murtazolu
posta in pees a monte Padre Santu
Dae Berre Ortucale as s'impiantu
E dae cue as leadu volu

In su Condaghe e Trulla iscrittu an solu
Chi fis su locu de importu tantu
Como de pannos noos pones mantu
E de modernidade leas bolu

De Orolos mantenes s'imponenzia
De Mulargia sas molas mustras galu
Connotas ses pro radio Sardigna

Fis de cumannu sa sede e s'insigna
In tempus bonu e in tempus malu
De te totue ana connoschenzia

Peppe Montesu
Jannarju 2017

Pro Cardedu

Fis a borgu isoladu reduidu
Terra de gardu e de sole infocadu
Umbe su mare ridente azurradu
Caentavat su sole apen'essidu

Unu volu da Gairo vennidu
de paese s'insigna a tie at dadu
E in Pelau umb'an sudoradu
Ponen predas formennesi unu nidu

Costruin crejas iscolas istradas
Chin afetu t'adornan che dama
E ti pianan de vida e de briu

De sa zente ti torrat su ninniu
Ca ses de coros preziosa mama
E novas vidas tenes inserradas

Peppe Montesu
Aprile 2017

Pro Desulo

Casula, Fadda e Deidda t'an dadu
Cun versos immortales zusta insigna
Antica terra punta de Sardigna
Chi dulcura in totue as semenadu

S'uju chi t'idet arreat ammiradu
Ca de ispantu su coro li signas
Ses che funtana frisca carapigna
De chie t'amat e t'at abitadu

Ovolaccio Isseria e Asuai
Si rimunin in te in d'unu unidu
Formenne un quadru singulare

In Ura sole terra seculare
Gullis de su passadu su sentidu
Chi tue ammentas e non lassas mai

Peppe Montesu
Jannarju 2017

Pro Dualchi

Intesu as de Poddighe su prantu
Canno naschinne in abba l'an lavadu
De Caddeo su versu as ninniadu
Ambos cun rimas ti an dadu vantu

As abiles fantinos de ispantu
In s'ardia ch'a Predu as cunsacradu
Duarche chi su cultu as cunservadu
Chin crejas de valore e de incantu

Crobos chi S'Ulivera e chin sa Corte
Mustran fieras anticas orminas
Chin Su Putzu e chin Fronte e Uda

Istoria de mannesa chene duda
Chi contan galu che bezas ruinas
Chi vintu an su tempus e sa sorte

Peppe Montesu
Jannarju 2017

A Durgali

Attis sos nuscos de abbas salidas
A s'arborida campagna Orunesa
As de montes marinas sa bellesa
De manos bonas e aturas dechidas

Chin ammentos nuragicos ischidas
Sa sardidade e li das livesa
Tue gentile nobile cortesa
Naras racontas e ancora isfidas

De natura e d' artes ses sa mama
D'omine fortes e bellas feminas
Chi ti connoschen in su munnu intreu

Pacas b'at che a tie a parrer meu
Chi tenzan simizantes raichinas
E inferzin in coro amore e brama

Peppe Montesu

Pro Elini

Pro Cocco fis presidiu romanu
E sun'issos chi numene t'an dadu
Sa creja 'e Carmelu in s'abitadu
Fracada in granitu as meda istranu

de abbas ses bunnante cantarunu
e du buscos umbrosos cucuzadu
de olias e frutas piantadu
miras su mare nitidu a luntanu

ses de Bainzu sa sua proteta
de Ilbono e de Arzana vichina
a Gennargentu miras a ponente

de amistade e amorosa zente
abitada tra montes e marina
ses de reposu sa bidda perfetta

Peppe Montesu
Aprile 2017

Pro Gadoni

Arrastos millenarios arcanos
Tue Gadoni los mostrás fieras
De su ramina antica miniera
D'usos antigos e tempos luntanos

Burras telarjos e abiles manos
T'an dadu fama in Barbagia intera
Tue operosa volante pandera
De cumbentos e prade franziscanos

Corongia ti ammantat de forestas
Monte Su Scova atenta ti mirat
De Flumendosa intennes ninniu

Su tempus de su ramina as finiu
E dolorante sa crisi ti zirat
Ma animosa e corale semper restas

Peppe Montesu
Jannarju 2017

Pro Gairo

Dae su grecu numen as leadu
Ca in terra franosa is costruida
Sa zente da cue ch'est fuida
E prus a sussu t'at edificadu

A Elena as fatu su sacradu
E la festeggias chin fide infinida
Perda Liana miras sa dechida
chin Gennargentu a tie a fiancadu

de Agus ses sa mama e sa nadia
e de Franco Ferrai su pittore
fizos defama e de altu intellettu

ses de s'Ozastrea s'isteddu diletto
pienu de bellessa e de sudore
dotes sinceras chi as tue ebbia

Peppe Montesu
Maju 2017

Pro Garteddi

Dae s'altu su Cristu Redentore
A tie mirat chin benigna ojada
Deledda fit de te innamorada
Pro sos tuos passados isplendores

Su Crucifissu e su Mortu Segnore
Cunservas in sa creja venerada
a Tuttavista donosa apozada
su Cedrinu ti cazat s'assutore

Ricca ses de istoria e devota
ca sede vescovile is in passadu
tue de Baronia rica prenda

De bellesa in sa zona ses sienda
chin onore in su tou as operadu
ses in totu su munnu riconnota

Peppe Montesu
Jannarju 2017

Pro Gavoi

In Monte 'e su Sennore ses corcadu
Faghenne faza a Mele e Pisanu
Istigas as de s'imperu romanu
Chi in Taloro che as cucuzzadu

Ses da umbrosos buscos circundadu
E de orminas de tempus luntanu
As tamburinos chin su sonu arcanu
Chin casu bonu e meda rinomadu

Oje t'ammantas de fines culturas
e ses piena de rara bellesa
Chi mostras orgogliasa a su turista

Su Gennargentu li mostras a vista
In s'arte pastorale as praticiesa
Ca as buscos cumones e pasturas

Peppe Montesu
Jannarju 2017

Pro Girasole

Gelisuli in sardu ses giamada
Ma prima Gelisoi fis mutida
Girasole ses como sa dechida
De Ozastra sa bella delicada

Sulcis chi fis tue sa famada
Raccontat connoschenne sa naschida
In su turismu ses tue creschida
Ca de abbas salidas ses bagnada

As delicados gustos e sapore
Mares e rios ti faghen corona
De cortesia as nomea e vantu

Ses de sa zona delicadu ispantu
E de ospitalidade sa matrona
Pro sos turistas mannos e minores

Peppe Montesu
Maju 2017

Pro Ilbono

Naran chi de sirvones fis padente
E da issos su numen n'apas tentu
In Sceri mustras s'anticu portentu
De fastos chi ais anticamente

Pares d'Ozastra sa dulce ridente
Cun buscos chi ti faghen ornamentu
Rios dechidos chin currere lentu
Ti adornan dechida e attraente

Corongiu Corti Accas Bau e Giuncu
T'Infunnen e ti bagnan sos terrinos
Cun abbas delicadas cristallinas

Olias binzas in amenas collinas
Ti dana ozu e prelibados vinos
Chi a sa bucca aggradin e a runcu

Peppe Montesu
Maju 2017

Pro Irgoli

Bidda e ballos de sonos e cantos
Chi su tempus racontas in sas predas
Abbas as bidu currere massedas
De su Cedrinu tra risu e piantos

De Baronia nuscos e ispantos
Serrados juches in dechidas sedas
De buscos e padentes ti arredas
De vaddes e alturas de incantos

Janna e pruna miro e Su Natante
Chin su padente a benner Talache
Chin Norghio e ateras belluras

Amenos locos arbures fozuras
Chi de sa zona t'incoronan re
De vadde e monte tue dominante

Peppe Montesu
Jannarju 2017

Pro Jerzu

Chi ses naschidu naran i Pelau
e a su monte ti ses trasferidu
ca cue suta in cue naran as patidu
e continu venias irrobau

Da Regaliu fina a Lumbarau
lughe bies de sole apen'essidu
in donzi locu vinu b'as bennidu
ca li ses mamma a su Cannonau

Porcu e Ludu e Troischi t'incastonan
Mamutara e Tisiddi sun armados
sun sentinella a ridentes belluras

Ricca de vinzas in pranu e alturas
das in totue vinos prelibados
chi richesa ti dan e fama donan

Peppe Montesu
Maju 2017

Pro Lanusei

In pedes a Selene collocada
De fontanas bunnantes ses piena
Terra de buscos dechida e amena
De s'Ozashtra afabile istimada

Ses in s'astronomia numenada
E as fama d'istoria terrena
Cun sa creja e Maria Madalena
E d'ateras d'istoria passada

Gesuitas e prades franziscanos
In sos tempos ti ana preferidu
E t'an d'issor' operas pienu

A Mameli li das su primu alenu
Ca in su sinu tou isse est naschidu
De fervores intintu italianos

Peppe Montesu
Maju 2017

Pro Lei

Che nue ses in costa collocada
Che sentinella de sa vadde intrea
De s'Olimpu mi pares una Dea
Miranne in terra sa zent' afannada

In s'umbra de su Marghine corcada
Nudda ti moghet nemos t'ispreat
Pares narenne benit inche arrea
Intenne de su tempus sa passada

De panes fioridos contas tue
A santu Marco totu intitulados
Fatos pro festa de tempos antigos

Lei de usos gentiles e ricos
Ti faches gala te tempos passados
Chi de te si ammentana totue

Peppe Montesu
Jannarju 2017

Pro Loceri

Su mille novichentos dechesette
de lampadas in die soliana
In s'albu de s'onore iscrittu t'ana
A pugnale a sambene e muschette

Animosu e lestru che coette
Podda chin sa pandera Italiana
Perdet sa vida in terra luntana
In cuss'assalt'a mort'abrazette

De Pilia ne vantat sa sa nadia
sa Sardidad' as in cor'e mente
e fiera la mustras in tottue

dechidas binzas olia as tue
e de arbures prenu su padente
umbras e abbas chi as tue ebbia

Peppe Montesu
Maju 2017

Pro Loculi

Nan chi de sacralidade fis locu
Gai narat sunumen chi t'an dadu
Vicinu a su Cedrinu collocadu
Umbe ninfas de riu faghen jocu

In istiu e calura cazas focu
Ca non t'an dadu postu riparadu
Ma su sero s'alenu ventiladu
Dae mare ti tenet a isocu

In ballos e i in cantos tenes fama
Ses ospitale e as zente e afidu
Laboriosa totue connota

Zente bi as in s'istudiu dota
E chi s'amicu ses semper cumpridu
Che i sa Baronia chi t'est mama

Peppe Montesu
Frearju 2017

Pro Lodè

Dae Montalbo su sole a manzanu
Falalat caente pro t'inn'ischidare
In riu Mannu si solet bagnare
Onzi die de nou in modu arcanu

A su Calvariu tocas pee e manu
Ca pares posta in pede e altare
Ses Lodè tue terra singulare
tra su monte sa vadde e su pianu

De Muzu e Boes contan ses nadia
Omine de isprene e de valore
Intrepidu balente fizu tou

Pro corazu connotu fit a prou
Pro zustiscia fit abbas e terrore
Ch'at dadu provas d'alta balentia

Peppe Montesu
Frearju 2017

Pro Lodine

Vicinu a Onne , Gavoi, Ollolai
Miras su Gennargentu a tie innante
D'animu forte de zisu bastante
annanne sola non ti firmas mai

Istitada ti ses tue oramai
Dae sa vidda chi as confinante
Fis de importu e ses importante
Ca su destinu tou fit de gai

Campos e buscos ti faghen corona
Pasturas bellas riccas de armentos
Chi ti dan casu latte petta e lana

Sos chin passadu a tie vid'ana
De su chi fis no an pius ammentos
Ca pares de sos montes sa matrona

Peppe Montesu
Frearju 2017

Pro Lotzorai

Posta tra s'Arenada e Palmaera
Miras su mare dechida e amena
Devota ses de Barbara e Elena
Ses de Medusa sentinella altera

Ses totu s'annu eterna primavera
De rigores non sentis d'issos pena
A Tomeu li faghes sa novena
In lampadas cun fide prus sinzera

Tancau pollu chin is arrosas
Sun'ispiaggias notas in totue
De reposu e friscuras dispensereras

Mare pulidu nitidas aeras
A chie ti visitat donas tue
Chin dulcuras afettu e tantas cosas

Peppe Montesu
Maju 2017

Pro Lugula

A pedes de Montalbo collocada
Pares romana nobile matrona
De minieras fit ricca sa zona
Como pares signora abbandonada

Tue pro cantos e ballos famada
Fizos medas bi as in Elicona
De altu versu e armonia bona
Rimas t'an dadu e ti an cantada

A prideros artistas e bannidos
Nadia as dadu e nomea as tentu
In sa barbagia e su Logudoro

Zente balente d'isprene e de coro
Chi ti an dadu dolore chin cuntentu
Momentos dulches a fele cunnidos

Peppe Montesu
Frearju 2017

A Macumere

Macumere ridente cittadina
Ch'as dadu sa nadia a Merzioro
A su Marghine totu das decoro
De Montiferru s'illustre vichina

Cale sardu de tene mi onoro
Ca tenes fizos de grande ladina
Industriosa antica cittadina
Iscrita in s'istoria a cifras d'oro

Samben sardu sa terra at'infustu
In locos tuos pro un'ideale
De nazione chi nos an leadu

In terras tuas Alagon at lassadu
Su sognu chi ancora faghet male
De sa Sardigna unida in su zustu

Peppe Montesu
Frearju 2017

Mamujada

A Canneddu e Atzeni sa nadia
terra forte e antiga tue as dadu
su mamutone a simbulu as leadu
cun issoccos de alta balentia

sas vinzas de nieddu prelibadu
ti coronan faghenneti maghia
D'ingegnu altu e manna maestria
Contas de cavaglieri in passadu

Mama de festas de ballos e cantos
In Barbagia t'ammiran e ti vantan
Ca ses de sardidade una funtana

Locu de abbas e aghera sana
sas predas tuas d'ammentos incantan
ca ti dan de su tempus sos ispantos

Peppe Montesu
Frearju 2017

Pro Meana Sardo

De mesania tue fis contrada
De un'antica istrada romana
Duncas nadia as tue luntana
E fis dae sos Sardos fentomada

Dae mannos nuraches coronada
Ses coro anticu e sa terra isolana
Vinzas e campos prodotos ti dana
Chin'incunzas de terra sudorada

De su Mandrolisai bella dama
De sa Barbagia antica matrona
Connota pro artistas e pintores

Mustras ancora oe sos lucores
Chi importu ti dan in donzi zona
Che fidele e fiera sarda mama

Peppe Montesu
Freaaju 2017

Pro Noragogume

A Santa Rughe a tunnu li ziras
Vas a Perda e Taleri e a Tolinu
A Iriddocco lu tenes vicinu
A Omodeo da innedda miras

Umanas lottas odios e iras
Ti an tintu de luttu su ghintinu
Ti an feridu su pettu e su sinu
Chin sas crudees mortales ispiras

De caddos e fantinos ses signora
Connota ses in donzi contrada
Dae tempos lontanos ses famosa

De Marghine ses dulce mariposa
De sa piana gemma delicada
Semper a s'uju nostru incantadora

Peppe Montesu
Frearju 2017

Pro Nugoro

De s'Ortobene sa fiza famada
Chin raighinas in tempos luntanos
In terras tuas balentes umanos
D'art'an' iscritu s'istoria passada

Zente fiera ti at abitada
D'altu intelletu e abiles manos
Omines fortes modosos e sanos
Chi t'an giamadu sa terra istimada

De sa Sardigna ses anima e coro
De sa cultura sa fiera mama
De cantos e de ballos sa reina

De Gennargentu de vantu vichina
A Deledda l'as dadu tue trama
D'esser in sinu tou minn' onoro

Peppe Montesu
Frearju 2017

Pro Oliana

As unidu a Ghirtalu e Golcone
Chin Filicore Dule e chin Locoe
Sas terra chi tancadas tenes oe
Fini de Costantinu atribuscione

De Franca Jurifai as su blasone
E chin ateros battor sun noe
Gheremaddi e Gadu a bonu proe
Filihuru e Sovana chin rejone

Tue ses operosa e acchijola
E tenes locos de rara bellura
Chin bellos montes e ricas funtananas

Mantenes usos e modas arcanas
Chin sos vestires chi paren pintura
Onore de custa terra Sardignola

Peppe Montesu
Frearju 2017

Pro Ollolai

Prima fis Alalà e Allalè
In finis Ollolai ti an giamadu
A Ospitone Pastore famadu
As dadu tue onore de rè

Perdidu as sos fastos ahimè
E a su nudda como se torrada
Comente che a tottu ispopoladu
Non bolas prus caminas a pè

Che i sos grecos e sos bizantinos
Tue a Basili e Micheli t'invocas
Pro ti dare cunfortu in sos afannos

Canisteddos isportas bellos pannos
faghen cun maestria sas pizocas
d'isplendidos colores e ghintinos

Peppe Montesu
Frearju 2017

Pro Olzai

Rettore Mele a tie at cantadu
In Sarda poesia onzi difetu
De usos e de pogheros s'isetu
N'at iscritu in versu metricadu

A Floris sa nadia tue as dadu
E t'at tintu a colore e tratu netu
Zent'as apid'e pinna e de cunzetu
Chi de importu tratados at firmadu

Dae S'ispillu Eliai e Fasolu
Sichi su Fronte de Oriniai
A S'Abisorgiu e Santu Bustianu

Golasodine no che est luntanu
Accurzu a b'est Basili e Lapazzai
Cun Cannisone e Loro a un bolu

Peppe Montesu
Frearju 2017

Pro Onani

Diegu Asproni ti at abellida
Cun murales de pregiu e de valore
In “corfos de istrale” su colore
Ti dat Deledda a pinna abellida

De santu pretu as creja insignida
Chi dat ispantu a su visitadore
Locu d’incantu e locu e tenore
Chi a su mortu ne torrat in bida

Crejas de campu e nuragicas predas
Ti dan adornu e ammentan de te
De su chi fis in su tempus passadu

A sialta Baronia iscampiadu
Pares in conca corona de re
Chi sa camapagna mudas e arredas

Peppe Montesu
Frearju 2017

Pro Oniferi

Cann'a tenore li pones intonu
Ammentas lampajones suta chelu
Onieri ti prenas de anelu
Mutinne su dolore afizu bonu

Dae sas Concas paret cuddu sonu
Chi essat e ispannat unu velu
Cun suave armonia pren' e zelu
Che siat dae Deus zustu donu

Dae Settiles Murtas e Predosu
Finas Moddoroco Ola e Brodu
De suave armonia si pienat

Su coro tristu de cunfortu prenat
Li dat alenu isolvat sui nodu
Daenne torra briu dassa e gosu

Peppe Montesu
Marthu 2017

Pro Onne

Alta reina ses de Gennargentu
Terra d'omines fortes e balentes
Bellas feminas caras isplendentes
de altu tratu e de portamentu

Miras sa terra sarda a perdimentu
dae levantes fina sos ponentes
su sole sos isteddos risplendentes
chi sos urridos muiols de bentu

Rios padentes ti faghen corona
dae sa puntas e da sas nieras
umbe ti ses setida e collocada

Tue prima Sorabile giamada
de nuraghesas istigas fieras
chi mustras chin bellura in d'onzi zona

Peppe Montesu
Marthu 2017

Pro Orani

Dae Gonare sa divina mama
A tie mirat chin benigna ojada
de Delitala ses sa terra amada
e cun Niola as apidu fama

Niffoi in romanzos ti dat trama
E Deledda ti at immortalada
Terra laboriosa incastonada
Intro sos coros pienos de brama

As chin su talcu apidu nomea
Chin sa cultura ispantu t'as dadu
E chin sas artes ti as fatu onore

Amica e solidale in su sudore
Semper su bisonzосу as azudadu
a totu nota in sa sardigna intrea

Peppe Montesu
Marthu 2017

Pro Orgosolo

Terra forte intrepida ostinada
Chi as nomea de grande corazu
Semper ses de sa lota su sonazu
A segus mai ti che ses tirada

Ses fidele in usos e limbazu
De sa terra barbarica contrada
Sambenosa amica e airada
Marcas chi as palas e costazu

Cussas feridas t'aperin su coro
E dolentes ti giaman in totue
Danne forza a tie in s'amistade

Tue ses su modellu e libertade
No t'oscurat ne neula ne nue
Mantenenne totue su decoro

Peppe Montesu
Mathu 2017

Pro Orosei

Sas abbas Srezis canno sun passidas
De su Cedrinu barbaricu riu
Las das a mare in dulce ninniu
Canno sun totu cue remunidas

As vidu de artistas naschidas
E de Mojolu s'orgogliu e su briu
A isse renno chin su cantu miu
Vantu e corona a chimas fozidas

Ses in cantos e ballos sa famada
As sa misura s'intonu su trattu
Chi lu connoschet sa Sardign' intera

Ses festosa amabile sincera
E onore in totue ti as fattu
Fanum Orisi in anticu giamada

Peppe Montesu
Marthu 201

Pro Oroteddi

Cun graniticas predas che casteddos
Ses dae Mussinzua separada
Sa nurachesa istoria passada
Contan Sa Turre chin Sinne e Aeddos

A sa creja romanica d' aneddos
Faghen domos de bidde fraigada
De Forolo sa tumba numenada
Chin Corcove Calaone che isteddos

Cambosu rinomanzia t'at dadu
Cun tratos d'intelletu e de colore
Postos in libru pro eternu ammentu

Tue de amistade das cuntentu
In locu tou a su bisitadore
Cun su traballu tou sudoradu

Peppe Montesu
Marthu 2017

Pro Ortueri

Fis tessidora d'oressi famada
E de vrustica balente artigiana
Vinzas dechidas continu ti dana
Vinos de calidade prelibada

Raighinas in Preda Litterada
Contan sa tua istoria Romana
Predarba , Mui Muscas de te nana
Chi ses dae bellesas circundada

A Nicola devota tue pregas
Ses a s'amicu atenta semper tue
A s'istranzu mustrannet' ospitale

In Predarba bellesa naturale
de S'isteddu sa Conca mustras cue
De sas bellesas chi as e mai negas

Peppe Montesu
Marthu 2017

Pro Orune

Ca intro e coro ti apo inserrada
a ti cantare a tie m'est obbligu
mai d'amore custu coro est sigu
pro te Orune cara vidda amada

Bramare t'apo e t'apo bramada
terra nadia de tempus antigu
luntanu dae te isto mendigu
s'anima mea n'istat afannada

Tue terra fieru mi as marcadu
m'as dadu limba forza e dadu briu
e serras de su coro afetos mios

Montes e vaddes arbores e rios
son assentados in s'ammentu miu
in eternu de te innamoradu

Peppe Montesu
Marthu 2017

Pro Osidda

Ancora oe adornana a tie
Domos de predas chin bellas ventanas
Paren de chelu sas domos de janas
Chi s'uju alligran siannas inie

Ammentos tantos aperis a mie
De contos e istorias arcanas
De tessidoras de morbidas lanas
Fatos in cue forzis carchi die

Ammentu chi diventat semper lenu
Pro su partire chi non torrat mai
Chi ti leat de coro donzi biu

Sempres prus briva e su tou nadiu
Sufri in petus chene narrer ahi
De abandonu continu pienu

Peppe Montesu
Marthu 2017

Pro Osini

In sutta de su taccu collocada
Miras de Pardu su curren ridente
Lassadu as su vezzu decadente
E pru a sussu ti an sistemada

Dae Jorji e Susanna ses amada
E d'ambos duos d'isso ses fervente
Canno essit su sole in oriente
Da onzi raju suo ses basada

Serbissi , Urceni, Samuccu chin Sanu
Contant pius de libru e iscola
De nuragicos fastos de importu

De operas artisticas ses portu
De Nivola de Lai e de Sciola
Chi ti abbellin e ti dan sa manu

Peppe Montesu
Maju 2017

Pro Ottana

De s'isola ses centru e ses coro
De Boes e Merdules sa terratza
De s'Angule su locu e sa piatza
Prena 'e campos chin ispigas d'oro

Como lassadu t'ana a seccacoro
Prena e dolos e chene caratza
Privadu t'an de chivu e de granatza
Ca t'an prenadu de argas issoro

Su progressu ti at abandonadu
Ti at distrutu sa aturas tuas
Daenneti de bene illusione

In su Tirsu sas lacrimas che pone
Arrea ritza apranta non ruas
Dereta torra a s'illustre passadu

Peppe Montesu
Marthu 2017

Pro Ovodda

Lacanas chin Orohole a Gennargentu
Chin Tiana Gavoi e chin Tonara
Teti vicina la as cara cara
E a Olzai reparas su ventu

Ses da Oleri fughida a istentu
Fin a Biduni s'irballo mi nara
Locos possedis de bellesa rara
Chi dan a s'uju ristoru e cuntentu

De Don Conte ammentas in festa
Chin su focu sa sua dispedida
Chin cantos ballos e omnes tintos

Pudores refrenos sunu bintos
Torras de poi a sa normale vida
De nou torras gentile e onesta

Peppe Montesu
Marthu 2017

Pro Perdasdefogu

Sus furros de calcare ti an dadu
Su numen caru de Perdasdefocu
Nan ch'in'antichidade fis su locu
In umbe fit estratu e trasformadu

Chin Nenniri abbellis su sacradu
Pro abbondanza faghenne s'invocu
Sas aes e sas feras faghen giocu
In sos buscos chi as a circundadu

A Bustianu ,Arbara e a Bobore
Devota tue t'invocas e pregas
E puntuale los festas costante

De bass'Ozastrea ses sa dominante
Pares de mele dulcorosas regas
Prena de nuscos e intattos sapes

Peppe Montesu
Maju 2017

Pro Posada

De Baronia sa perla dechida
Ti mirat sa Barbagia in simpatia
da cue, forzis, sa tua nadia
In sos tempos passados est partida

Tue in sos coros restas imprimida
Ca a neunu mantenes in via
Ses ospitale piena e ghia
Anticu portu de s'era perdita

Feronia a tie t'an giamadu
Ca is de fertilesa numenada
E chin su mare tenes arrejonu

As chin s'amicu su trattare bonu
As ricchetas d'istoria passada
E su benente as bene avviadu

Peppe Montesu
Marthu 2017

Pro Sarule
Dae Ghirthoe a Monte Gonare
Sarule annas arrivanne a chelu
Sutta su monte che pintura in telu
Ti ana postu che divinu altare

Mama de Sini de cantic'anelu
Possedis su faeddu singulare
In tessiduras amas ricamare
reina in su telarju ses d' intelu

as mascheras de gattu e Maimone
nuraghes de importu e de arrastu
naran chi ses de naschida luntana

Incavadu e Durghio vidu ana
Su trattare terribile nefastu
De Arabos Pisanos e Ospitone

Peppe Montesu
Marthu 2017

Pro Seui

Fis de carbone una veza vena
E as arrastu d'anticas istigas
In Ardasai s'istoria isprigas
E in Montarbu bellura as amena

A sa Barbagia ligada a cadena
Da issa fieressa e forza pigas
Sa zente tua a ateras amigas
Est de azudu e mai de pena

Bissiri Lecis Ballici chin Loy
T'an de lustru e de fama pienadu
In terra sarda e in su munnu intreu

Terr'e incantu ses e de recreu
De unu regnu incontaminadu
Chi non s'acatat in sartos d'ingoi

Peppe Montesu
Maju 2017

Pro Silanus

De Marghine sos montes a corona
Silanos t'inghirlandan che reina
Nuraghes bellos e santa Sabina
Ti dan su tratu de noa Elicona

D'altos poetas sa nadia as bona
Cun bezos chi an longa raighina
In passadu sos cavas de carchina
T'an dadu connoschenzia in sa zona

Sos fizos tuos si an fatu onore
In creja in palcu e in parlamentu
Cun itelletu corazu e bravura

Dae sa vadde finas a s'altura
A s'uju das ispaju e das cuntentu
De ulias e buscos das colore

Peppe Montesu
Marthu 2017

Pro Sindia

De Campeda ses tue sa reina
As Montiferru e Marghine vicinu
Alvara e Sant'Antoni as a ladinu
Nurachesa b'as forte raighina

A Meilogu chin Puttu con finas
Sagama cun Iscanu as bighinu
Posta tra Carrabusu e riu Oinu
Ses de Planargia sa bella vichina

Su numes tou iscrit'a bellu arredu
In su condaghe e Trulla tintu l'ana
Che bella dama chi non tenet edu

Ses de Nugoro in cue ventana
E in coro indelebile as icrittu
Sas virtudes chi manna fattu t'ana

Peppe Montesu
Aprile 2017

Pro Sorgono

De su Mandrolisai ses reina
Binzas forestas ti faghen corona
Predas anticas bi as in sa zona
De nobilesa arrastu e ormina

Ses amena e ridente cittadina
E de cussa Barbagia ses matrona
As binu e casu chin aghera bona
Che ridente bellesa muntagnina

A lavoru operosu as postu banna
e d'onestade t'as fatu nomea
in domo tua e in terra anzena

de bellesas folkloricas piena
chi ti coloran che divina Dea
de Venus pares sas sorre prus manna

Peppe Montesu
Aprile 2017

Pro Talana

De zoventude fit dea venerada
su numes chi Talana ti an dadu
De Juvanne Battista as su sacradu
Chin su de Marta in bidda cunsacrada

Cann'a levante ghetas sa mirada
Si aperit a s'uju fortunadu
Su panorama immensu isconfinadu
Chi at in Bellavista sa falada

A Gennargent a ponente as innante
Cun bellos buscos e friscas funtanas
Chi ti dan'abbas umbras e friscuras
In Praidos nuragicas belluras
In Bau e tanca orminas luntanas
A sa natura ti rennene amante

Peppe Montesu
Aprile 2017

Pro Tertenia

Tra Mont'Arbu, Su Taccu e Monte Ferru
Ses tue Tertenia collocada
In sa vadde de Quirra arzas s'ojada
Truncanne in mare de montes s'inserru

Sos campos tuos de predas d'interru
Mustran fieros un'era passada
Canno fis importante populada
E abbrandavas rigores d'iverru

S'Abba de is Marronis e Foxi Manna
Ti dan nomea chin Foxi Murdegu
Chin Fustiragili e chin Crabiolu

Pro totu Albino Manca cito solu
Artista de valore mannu intregu
Connottu in s'oceanu a donzi banna

Peppe Montesu
Aprile 2017

Pro Teti

Contan su ch'is nuragicas predas
D'Atzadolai, d'Albini e Urbale
Impari tutu dan unu sinzale
Chi pannu de importu ias e sedas

Paren chi nian istatuas medas
Chi pro sos Sardos is che boreale
Aurora in su coro e maternale
Ca de nurachesas operas t'arredas

Istei Istickori e Alineddu
Funtana bona in sartu Turria
Chin Perdalonga ti faghen corona

De sa Sardigna su coro e s'icona
Sos bronzos chi aias tue ebbia
Naran chi de Barbagia fis casteddu

Peppe Montesu
Aprile 2017

Thiniscole

Ses de sa Baronia capitale
a Lodè lacanante e a Posada
De montes e marinas adornada
Ses onesta operosa e ospitale

Fiorente in su campu industriale
A rangu de Città t'ana elevada
Dae sas renas de Berchida famada
possedis d'onzi bene naturale

Capu Cominu chin Santa Luchia
Ti dana lustru e notoriedade
Paris chi sa Caletta e Cannazellu

Preda Marchesa unu lidu bellu
Chin su e Mare de Flumene ammirade
perlas raras ch'as solu tue ebbia

Peppe Montesu
Aprile 2017

Pro Tiana

Ti coronan sos buscos seculares
E friscas abbas ti curren vicinu
De Tino e de Torrei ses caminu
Ides de Gennargentu sos altares

Bid'as orjos e tricos molinare
Ca posedias de abbas molinu
In Monte susu ch'ides a ladinu
De sos oresis s'anticu isperthare

D'Antoni Todde fis domo e Nadia
centenarios situ ses ancora
in totue connutu istudiadu
in barbagia amenu collocadu
de sos montes reina ses signora
pro usos ses connotta e cortesia

Peppe Montesu
Aprile 2017

Pro Tonara

Mereu t'at mutidu sa gentile
E chin amore forte t'at cantadu
In sa morte amorusu t'at giamadu
Chi l'at rutu in edade giovanile

A Galusè chin garbadu istile
Bellisimu unu cantu at dedicadu
De abbas friskas brocas a prenadu
De feminas gagliardas cun tettile

Teliseri ,Arasulè chin Su Pradu
Son chin Toneri sa tua corona
E Muggianeddu sa punta reina

De castagnos nucciola as raighina
Tue novella dechida Elicona
de su turrone su logu famadu

Peppe Montesu
Aprile 2017

Pro Torpè

Da monte Nizzu a Cuccuru e Luna
Dae Preda Ruina a su Lidone
Finas a monte Ozastru as visione
e meravillas non ne lassas una

De Baronia de perla ses una
da s'altura a su paris ses timone
Ti serran de bellesa in d'un'ungrone
Montes e e rivos prenos de fortuna

Delitala a prinzellu ti dat vantù
Budduso ti coronat de istazos
Chi ti dan de su monte raighina

Faghes banna a s'altura e sa marina
As pianuras litos e crastazos
De fertile richesa e de ispantu

Peppe Montesu
Maju 2017

Pro Tortoli

Dae riu Foddeddu ses bagnada
Finas a Orri pro intrare a mare
de sa zona ses puntu singulare
Ca fis Sulci Tirrenica giamada

De Agugliastra terra rinomada
Umbe totu fin solitos annare
In portos tuos solian attracare
Naves romanas in sa traversada

As arrastos anticos de importu
De crejas e Nuraghes e de turre
Ch'istan contanne s'istoria tua

De s'Ozashtra importante ses sua
Perla ridente chi luntanu curre
Ca ses de su benente cussu portu

Peppe Montesu
Maju 2017

Pro Triei

In sa creja de Cosma e Damianu
Artisticos tesoros bi as serradu
De Pedru cussa linna as cunservadu
Ca est d'altu valore e bona manu

Chi fini tres in tempus lontanu
naran sas biddas chi ti an formadu
chin Ardali e Arridellu ses torradu
De nou a tres chin tecus mesulanu

Nonnoculi Nuraxi e Pizz'e Serra
Mustan sa nurachesas raichinas
E in Osono as tumbas gigantes

In Mullò a Antoni ses festante
E chin cussu Focone l'illuminas
e de Simbula in maju faghes perra

Peppe Montesu
Maju 2017

Pro Ulassai

in su taccu 'e Tisiddu incastonada
Che prenda amada de rara bellea
Mustranne sa dechida fieresa
Che reina da buscos coronada

Terra fis de bannidos infestada
E infascada de grande duresa
Ma oje ti ammantas de livesa
Che vera perla de cussa contrada

Vaddes e gruttas chin abbas bunnantes
B'as in Lecorci, su Marmuri e Pradu
Cun montes de bellea singulare

Monte Tisiddu locu e ammirare
Cun Attara su Seccu mentovadu
Son panoramas chene simizantes

Peppe Montesu
Maju 2017

Pro Urzullei

Sa natura prus bella immaculada
Miras chin s'uju dae Monte Santu
Lu ses istada e semper ses de vantu
In Barbagia e Ozastra craculada

De sos Sotgias ses tue cudda amada
Dimora preziosa e de incantu
Chin Turcali chi tue as accanto
Paret ch'apedas matessi aeddada

Mamorri, cun Ludine e cun Siddie
as cun Etili e Freari serradu
Ca de sa zona fis sa dominante

Ses de sa murra sarda sa festante
De craparjos su locu numenadu
E de cosas chi piaghen a mie

Peppe Montesu
Lampadas 2017

Pro Ussassai

Bas da Pissu 'e s'Abba a Isca e Pira
In pedes posta de Monte Arcueri
De virde incantas donzi passizeri
E lu prenas d'ispantu si ti mirat

Su turista chi benit e ti zirat
Lu faghes cun bellessas prejoneri
Tue lu cullis cussu foristeri
E tottu lu acisat e l'atirat

Santu Gironi e Sarbadori Santu
An beneitu sa tua bellura
E festosa lo tenes in ammentu

Ses de Barbagia forte bastimentu
Ses a ojos incantu de natura
De sa zona orgogliu ses e vantuu

Peppe Montesu
Lampadas 2017

Pro Villagrande Istrisailis

Naran su tempustue apas firmadu
perdidu s'est in sas tuas alturas
de centenarios mustras sas belluras
ca da issos luntanu ch'est coladu

In Colovros nonb'achet ghiradura
in Mesu idda est coladu a fura
in Cuccurone che l'an cancelladu

in Bau Porcos e tanca e Gurthoi
de sinzos suos non bi at arrastu
comente in Galaresu e Coccoledda

Da sites tuos che colat innedda
Mai bi colat non bi faghe pastu
De issu non s'intennet mancu ohi

Peppe Montesu
Lampadas 2017